



TÍTULO II MEDIDAS ADMINISTRATIVAS

III. TÍTULO II MEDIDAS ADMINISTRATIVAS

CAPÍTULO I Subvencions

Artigo 26.- *Requisitos para obter a condición de beneficiario ou entidade colaboradora.*

Modifícase a letra b) da alínea 2 do artigo 10 da Lei 9/2007, do 13 de xuño, de subvencions de Galicia, que queda redactado como segue:

“b) Solicitar a declaración de concurso, ser declarados insolventes en calquera procedemento, acharse declarados en concurso, salvo que neste adquirise a eficacia un convenio, estar suxeitos a intervención xudicial ou ser inhabilitados conforme a Lei Concursal, sen que conclúa o período de inhabilitación fixado na sentenza de cualificación do concurso.”

Artigo 27.- *Xustificación das subvencions.*

Modifícase a alínea 5 do artigo 28 da Lei 9/2007, do 13 de xuño, de subvencions de Galicia, que queda redactado como segue:

“5. Nas subvencions concedidas a outras administración públicas ou entidades vinculadas ou dependentes daquelas e ás universidades, a xustificación poderá consistir na certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida. Non obstante, para aquelas axudas e subvencions que se concedan con cargo a créditos financiados con recursos procedentes da Unión Europea, a xustificación dos gastos efectuarase con facturas ou documentos contables de valor probatorio equivalente, e a do pagamento, cos xustificantes das transferencias bancarias ou documentos acreditativos dos pagamentos realizados, de acordo coa normativa aplicable aos fondos europeos, todo iso sen prexuízo da admisibilidade da xustificación mediante fórmulas de custos simplificados nos supostos admitidos pola devandita normativa.

Artigo 28.- *Procedemento de aprobación do gasto e pago.*

Modifícase o parágrafo terceiro da alínea 6 do artigo 31 da Lei 9/2007, do 13 de xuño, de subvencions de Galicia, que queda redactado como segue:

“En ningún caso poderán realizarse pagamentos anticipados a beneficiarios cando se solicitase a declaración de concurso, fosen declarados insolventes en calquera proce-

demento, se atopen declarados en concurso, salvo que neste adquirise a eficacia un convenio, estean suxeitos a intervención xudicial ou fosen inhabilitados conforme a Lei 22/2003, do 9 de xullo, Concursal, sen que concluíse o período de inhabilitación fixado na sentenza de cualificación do concurso. A realización de pagamentos a conta ou pagamentos anticipados, así como o réxime de garantías, deberán preverse expresamente na normativa reguladora da subvención.”

CAPÍTULO II *Patrimonio*

Artigo 29.- *Taxacións, valoracións e informes técnicos.*

Modifícase o artigo 49 da Lei 5/2011, do 30 de setembro, do Patrimonio da Comunidade Autónoma de Galicia, que queda redactado como segue:

“Artigo 49. Taxacións, valoracións e informes técnicos.

1. As taxacións, valoracións e informes técnicos que se deban realizar para o cumprimento do disposto nesta lei deben explicitar os parámetros nos que se fundamentan, e poderán ser efectuadas por persoal técnico dependente das respectivas consellerías ou entidades que administren os bens ou dereitos ou que soliciten a súa adquisición ou arrendamento, ou por técnicos facultativos da consellería competente en materia de patrimonio. Estas actuacións pódense igualmente encargar a sociedades de taxación debidamente inscritas no Rexistro de Sociedades de taxación do Banco de España e empresas legalmente habilitadas, con suxeición ao establecido na lexislación de contratos do sector público.
2. Aos efectos da presente lei as taxacións, valoracións e informes técnicos deben ser aprobados, cando recaian sobre inmobles, pola consellería competente en materia de patrimonio. Tratándose de mobles pola consellería que os tivera adscritos e no caso de entidades públicas instrumentais, polo órgano competente para concluír o negocio correspondente.
3. As taxacións teñen un prazo de validez de dous anos, contados desde a súa aprobación, agás nos supostos excepcionais nos que a duración do procedemento administrativo no que deban producir efectos teña unha duración superior, nos que o prazo de validez das taxacións se prorrogará ata a finalización do procedemento.”

Artigo 30.- *Adquisicións a título gratuito.*

Modifícase o parágrafo segundo da alínea 6 do artigo 56 da Lei 5/2011, do 30 de setembro, do Patrimonio da Comunidade Autónoma de Galicia, que queda redactado como segue:

“Igal obriga corresponderá, no caso das herdanzas intestadas, aos propietarios, arrendadores e responsables das vivendas, centros ou residencias nos que finase a persoa causante, ás persoas que convivisen formal ou materialmente co finado ao tempo do seu falecemento ou ás que posúan a súa vivenda por calquera causa, así como, en xeral, ao seu administrador, representante legal ou mandatario. ”

Artigo 31.- *Vinculación aos fins dos bens e dereitos cedidos.*

Modifícase a alínea 2 do artigo 85 da Lei 5/2011, do 30 de setembro, do Patrimonio da Comunidade Autónoma de Galicia, que queda redactado como segue:

“2. Corresponde á consellaría competente en materia de patrimonio e, se é o caso, ao órgano unipersonal de goberno da entidade pública instrumental verificar a aplicación dos bens inmobles ou dereitos reais ao fin para o que foron cedidos, podendo adoptar para isto cantas medidas sexan necesarias.

No caso de bens mobles, estas facultades corresponderán á consellaría que adoptou o acordo de cesión ou ao órgano unipersonal de goberno da entidade pública instrumental.”

Artigo 32.- *Réxime administrativo da sucesión intestada a favor da Comunidade Autónoma de Galicia.*

Engádesse unha nova disposición adicional decimoquinta a Lei 5/2011, do 30 de setembro, do Patrimonio da Comunidade Autónoma de Galicia, co seguinte contido:

“Disposición adicional decimoquinta. Réxime administrativo da sucesión intestada a favor da Comunidade Autónoma de Galicia.

No non establecido especificamente nesta lei para as herdanzas intestadas deferidas a favor da Comunidade Autónoma de Galicia, estarase á normativa reguladora sobre o réxime administrativo deste tipo de sucesión legal mortis causa.

En todo caso, todos os actos necesarios para a administración, xestión, liquidación e distribución deste patrimonio hereditario, corresponderán á consellaría competente en materia de patrimonio, incluído o alleamento de calquera tipo de bens ou dereitos da persoa causante.”

CAPÍTULO III *Xogo*

Artigo 33.- *Casinos de xogos.*

Modifícase o artigo 8 da Lei 14/1985, do 23 de outubro, reguladora dos xogos e apostas en Galicia, que queda redactado como segue:

“Artigo 8.

1. Son casinos de xogos os establecidos expresamente dedicados á práctica de todos os xogos legalmente autorizados.
2. Os casinos haberán de contar, como mínimo, cos xogos referidos no apartado a) do artigo 6 , e neles poderán instalarse máquinas e terminais de xogo no número que se fixe regulamentariamente.
3. Nos casinos haberá un rexistro de admisión e un servizo de control e asistencia.
4. Unicamente se autorizará a instalación e funcionamento dun casino en cada provincia da Comunidade Autónoma, o cal, en todo caso, deberá contar nun radio de 25 quilómetros do lugar do seu emprazamento, medidos en liña recta, cun asentamento de poboación superior aos 300.000 habitantes.

Respectaranse as situacións de feito actualmente existentes en canto á situación de casinos.

5. Poderá autorizarse a cada un dos casinos de xogo a instalación e funcionamento dunha sala adicional que, formando parte do casino, se atope situada fora do recinto ou complexo onde estea situado este pero dentro da mesma provincia e nas condicións que regulamentariamente se determinen.
6. A dita sala funcionará como apéndice do casino do que forme parte. Nela poderán practicarse todos os xogos autorizados para casino nos termos establecidos regulamentariamente e deberá contar, en todo caso, cun rexistro de admisión e un servizo de control e de asistencia.”

CAPÍTULO IV Emerxencias

Artigo 34.- *Infraccións moi graves.*

Suprímese a letra d) da alínea l do artigo 50 da Lei 5/2007, do 7 de maio, de emerxencias de Galicia..

Artigo 35.- *Infraccións graves.*

Modifícase a alínea l do artigo 51 da Lei 5/2007, do 7 de maio, de emerxencias de Galicia, que queda redactado como segue:

“l. Constitúen infraccións graves as seguintes condutas:

- a) Obstaculizar, sen chegar a impedir, a inspección do estado das medidas e dos medios de autoprotección pola autoridade competente de protección civil.
- b) Non lles comunicar ás autoridades competentes de protección civil calquera circunstancia ou incidencia que poida xerar situacións de emerxencia.
- c) Non participar, no caso de emerxencia, agás causa debidamente xustificada, nas actividades previstas nos correspondentes plans o persoal voluntario dos grupos operativos.
- d) Obstaculizar, sen chegar a impedir, a destrución, a intervención ou a ocupación temporal e transitoria dos bens e dos medios de transporte, cando sexa ordenada pola autoridade competente de protección civil de acordo co establecido nesta lei.
- e) Non respectar ou obstaculizar o cumprimento das ordes e das instrucións emanadas das autoridades de protección civil en situacións de activación dun plan ou emerxencia declarada.
- f) Realizar chamadas abusivas, insultantes, ameazadoras ou xocosas de xeito reiterado ao 112, ou realizar chamadas reiteradas comunicando avisos falsos de urxencia”.

Artigo 36.- *Infraccións leves.*

Modifícase a alínea 1 do artigo 52 da Lei 5/2007, do 7 de maio, de emerxencias de Galicia, que queda redactado como segue:

“1. Constitúen infraccións leves as seguintes condutas:

- a) Realizar chamadas inxustificadas ao Centro de Atención de Emerxencias 112 Galicia sempre que pola súa natureza, ocasión ou circunstancia, no deban ser cualificadas como graves.
- b) Non seguir ou non respectar as medidas e as instrucións dispostas pola autoridade de protección civil e xestión de emerxencias cando se fagan simulacros.”

CAPÍTULO V *Turismo*

Artigo 37.- *Vivendas de uso turístico.*

Engádesse un novo artigo 65 bis á Lei 7/2011, do 27 de outubro, do Turismo de Galicia, co seguinte contido:

“Artigo 65. bis. Vivendas de uso turístico.

1. Son vivendas de uso turístico as cedidas a terceiras persoas, de xeito reiterado e a cambio de contraprestación económica, para unha estada de curta duración, amobladas e equipadas en condicións de inmediata dispoñibilidade e coas características establecidas por vía regulamentaria.
As vivendas de uso turístico poderán ser comercializadas, ademais de polas empresas turísticas reguladas no artigo 33.1 desta lei, polos seus propietarios/as ou persoa física ou xurídica que os/as represente. Neste último suposto non se aplicará o disposto no artigo 33.2 da lei.
2. Constitúen estadas de curta duración aquelas nas que a cesión de uso é inferior a trinta días consecutivos, quedando fora do ámbito de aplicación as que sobrepasen esa duración.
3. As persoas propietarias e/ou comercializadoras quedarán obrigadas fronte a Administración turística ao cumprimento das obrigas impostas nesta lei e nas normas que a desenvolvan e responderán de xeito solidario fronte a aquela.
4. As vivendas de uso turístico requiren da correspondente declaración previa de inicio de actividade perante a Administración turística."

CAPÍTULO VI *Comunicación audiovisual*

Artigo 38.- *Posta en marcha das emisións do servizo de comunicación audiovisual de televisión correspondentes as adxudicacións transformadas en licenzas.*

Un.- Tendo en conta o cambio de circunstancias producido dende o momento do seu outorgamento e a necesidade de viabilizar e por en marcha o servizo de comunicación audiovisual de televisión, os adxudicatarios das concesións para a prestación do servizo de comunicación audiovisual de televisión no ámbito da Comunidade Autónoma de Galicia outorgadas provisionalmente con anterioridade a entrada en vigor da Lei 7/2010, do 31 de marzo, xeral de comunicación audiovisual e transformadas en licenzas de acordo co disposto na indicada lei e no Decreto 102/2012, de 29 de marzo, disporán dun prazo de dous anos, a partir da entrada en vigor da presente lei, para materializar os compromisos asumidos nas ofertas presentadas e acreditar o cumprimento das obrigas contidas no prego de bases e a normativa reguladora para a posta en marcha das emisións, todo isto sen prexuízo do cumprimento dos compromisos asumidos que teñan que facerse efectivos ao longo da vixencia da licenza, como os de inversións materiais e de emprego.

Dous.- A administración xeral da Comunidade Autónoma, a través do órgano administrativo competente en materia de medios de comunicación audiovisual, dirixirase, no prazo de tres meses, dende a entrada en vigor desta norma, aos titulares das licenzas aos que lles comunicará as actuacións que teñen pendentes de realizar.

Tres.- Caso de non cumprir os compromisos e obrigas indicados no apartado primeiro deste artigo para a posta en marcha das emisións no período de 2 anos previsto nel, a administración xeral da comunidade autónoma, a través do órgano administrativo competente en materia de medios de comunicación audiovisual, iniciará os procedementos de revogación correspondentes tendentes a extinción das licenzas para a prestación dos servizos de comunicación audiovisual de televisión.

Artigo 39.- *Negocios xurídicos relativos ás licenzas do servizo de comunicación audiovisual de televisión.*

Os negocios xurídicos aos que se fai referencia o artigo 29 da Lei 7/2010 do 31 de marzo, Xeral de Comunicación Audiovisual que se pretendan levar a cabo con posterioridade á entrada en vigor desta lei así como os que se teñan comunicado con anterioridade á súa entrada en vigor, poderán ser autorizados pola autoridade audiovisual competente, sempre e cando os novos adquirentes ou arrendatarios acrediten previamente o cumprimento das condicións legalmente establecidas para a obtención da licenza e se subroguen nas obrigas e compromisos asumidos nas ofertas presentadas polos adxudicatarios iniciais, sen prexuízo do indicado no artigo anterior para a posta en marcha das emisións.

Artigo 40.- *Pagamento da taxa pola prestación do servizo de comunicación audiovisual de televisión correspondente ás adxudicacións transformadas en licenzas.*

A taxa pola prestación do servizo de comunicación audiovisual de televisión para as adxudicacións provisionais transformadas en licenzas, que de acordo co réxime xurídico aplicable no seu momento, se devengaba, unha vez aprobados os proxectos técnicos de enlace, estudos e difusión, no momento do outorgamento do título concesional, farase efectiva polos titulares das licenzas como máximo no prazo de dos anos a partir da entrada en vigor da presente lei e unha vez que se acredite o cumprimento das obrigas contidas no prego de bases e a normativa reguladora para a posta en marcha das emisións.

CAPÍTULO VII *Urbanismo*

Artigo 41.- *Protección y conservación del patrimonio cultural de Galicia.*

Un.- Modifícase a alínea 4 do artigo 32 da Lei 8/1995, do 30 de outubro, de patrimonio cultural de Galicia, que queda redactado como segue:

“4. Todas as figuras de planeamento urbanístico, tras a súa aprobación inicial, deberán someterse a informe vinculante da consellaría competente en materia de cultura. O informe deberá ser emitido no prazo de tres meses, transcorrido o cal, se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Dous.- Modifícase a alínea I do artigo 52 da Lei 8/1995, do 30 de outubro, de patrimonio cultural de Galicia, que queda redactado como segue:

“1. Os bens inmobles catalogados, así como o seu entorno, gozarán da protección prevista no artigo 17 da presente lei a través do correspondente catálogo, ao que deberá axustarse a planificación territorial ou urbanística, cuxa aprobación precisará o informe favorable e vinculante da consellaría competente en materia de cultura. O informe deberá ser emitido no prazo de tres meses, transcorrido o cal, se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 42.- *Coordinación co planeamento urbanístico.*

Modifícase a alínea 2 do artigo 23 da Lei 8/2013, do 28 de xuño, de estradas de Galicia, que queda redactado como segue:

“2. Nos supostos de redacción, revisión ou modificación de instrumentos de planeamento que afecten as estradas existentes ou as actuacións previstas nos plans de estradas vixentes, o concello remitirá, con posterioridade a súa aprobación inicial, o correspondente documento ás administracións titulares das estradas afectadas para que emitan informe sobre este. O informe terá carácter vinculante e deberá ser emitido no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 43.- *Informe de Augas de Galicia dos plans territoriais e urbanísticos.*

Modifícase o artigo 39 da Lei 9/2010, do 4 de novembro, de augas de Galicia, que queda redactado como segue:

“ Artigo 39. Informe de Augas de Galicia dos plans territoriais e urbanísticos

1. Deberán someterse a informe de Augas de Galicia os instrumentos de ordenación territorial e os plans xerais de ordenación municipal tras a súa aprobación inicial. Igualmente deberán someterse a informe de Augas de Galicia a aprobación e modificación dos plans parciais e especiais que conteñan determinacións co mesmo obxecto que os plans regulados pola presente Lei.
2. O informe versará exclusivamente sobre aqueles aspectos relacionados coas competencias en materia de auga e obras hidráulicas da Comunidade Autónoma de Galicia e terá nese ámbito carácter vinculante. Especialmente tratarase no informe do respecto polos instrumentos territoriais e urbanísticos do contido da planificación hidrolóxica, así como dos plans de abastecemento e saneamento, cando estes existan.
3. O informe deberá ser emitido no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 44.- *Informes sobre os instrumentos de ordenación do territorio e o planeamento urbanístico.*

Modifícase o artigo 66 da Lei 7/2012, do 28 de xuño, de montes de Galicia, que queda redactado como segue:

“Artigo 66. Informes sobre os instrumentos de ordenación do territorio e o planeamento urbanístico

Os instrumentos de ordenación do territorio, os plans xerais de ordenación municipal e os plans especiais non previstos nos plans xerais, así como a modificación destes instrumentos, requirirán o informe sectorial da Administración forestal. Dito informe terá carácter vinculante cando se trate de montes catalogados, protectores e terreos rústicos.

O informe deberá ser emitido no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 45.- *Consello de Administración do Ente Público Portos de Galicia.*

Modifícase a letra e) da alínea 3 do artigo 7 da Lei 5/1994, do 29 de novembro, de creación do Ente Público Portos de Galicia, que queda redactado como segue:

“e) Propoñer aos órganos competentes da Xunta de Galicia, a través da consellería competente en materia de portos, a aprobación dos plans de obras, de instalacións dos portos e das súas ampliacións, así como dos plans especiais de ordenación portuaria.

Cando se trate de plans de obras ou instalacións portuarias e as súas ampliacións ou plans especiais de ordenación portuaria cuxo contido sexa de natureza pesqueira, con posterioridade a súa aprobación inicial, recabarase o informe da consellería competente en materia de pesca. O informe deberá ser emitido no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 46.- *Solos contaminados.*

Modifícase a alínea 2 do artigo 47 da Lei 10/2008, do 3 de novembro, de residuos de Galicia, que queda redactado como segue:

“2. En relación con ditos solos e ao obxecto de determinar a viabilidade dos usos previstos no ámbito a desenvolver, para a tramitación dos plans urbanísticos deberá presentarse, xunto coa documentación esixida pola normativa de aplicación, un informe da calidade do solo.

O concello remitirá os plans urbanísticos, con posterioridade a súa aprobación inicial, ao órgano competente en materia de residuos, o cal deberá emitir informe no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.”

Artigo 47.- *Cooperación en materia de paisaxe.*

Modifícase o artigo 7 da Lei 7/2008, do 7 de xullo, de protección da paisaxe de Galicia, que queda redactado como segue:

“Artigo 7 Cooperación en materia de paisaxe

“1. A Xunta de Galicia impulsará a cooperación con todas as administracións públicas con competencia no territorio, especialmente coas administracións locais, co fin de promover o desenvolvemento de políticas comúns, debidamente coordinadas e programadas, que aseguren o cumprimento dos fins que se conteñen na presente lei.

2. Os plans xerais de ordenación municipal, tras a súa aprobación inicial, deberán someterse a informe do órgano competente en materia de paisaxe, informe que versará sobre os aspectos paisaxísticos do plan.

O informe deberá emitirse no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas."

Artigo 48.- *Órganos autonómicos competentes en materia de control de riscos inherentes aos accidentes graves nos que interveñan substancias perigosas.*

As funcións asignadas ás comunidades autónomas polo Real decreto 1254/1999, do 16 de xullo, polo que se aproban medidas de control dos riscos inherentes aos accidentes graves nos que interveñan substancias perigosas, serán exercidas, na Comunidade Autónoma de Galicia, polos seguintes órganos:

- a) Xefaturas territoriais e a dirección xeral con competencias en materia de industria.
- b) Dirección xeral competente en materia de emerxencias e interior.
- c) Secretaría xeral con competencias en materia de calidade e avaliación ambiental.

Artigo 49.- *Informe do Consello Autonómico para a Promoción da Accesibilidade e a Supresión de Barreiras sobre solucións alternativas a itinerarios peonís.*

O informe do Consello Autonómico para a Promoción da Accesibilidade e a Supresión de Barreiras previsto no artigo 16.7 do Regulamento de desenvolvemento e execución da Lei de accesibilidade e supresión de barreiras na Comunidade Autónoma de Galicia, aprobado polo Decreto 35/2000, do 28 de xaneiro, deberá ser emitido no prazo de tres meses, transcorrido o cal se entenderá favorable.

No caso de ser desfavorable, o informe indicará expresamente, no seu caso, as normas vulneradas.

Artigo 50.- *Procedemento para a adaptación dos solos ao Plan de Ordenación do Litoral de Galicia.*

O procedemento para a adaptación dos solos ao Plan de Ordenación do Litoral de Galicia axustarase ao previsto no artigo 102 do Decreto 20/2011, do 10 de febreiro, polo que se aproba definitivamente o Plan de Ordenación do Litoral de Galicia, sen que sexa

esixible, en ningún momento da tramitación do procedemento, o informe sectorial do departamento competente en materia de paisaxe recollido no apartado 4 do citado artigo.

CAPÍTULO VIII *Emprendemento e competitividade económica.*

Artigo 51.- *Funcións do Consello Galego de Economía e Competitividade.*

Modifícase a alínea 1 do artigo 20 da Lei 9/2013, do 19 de decembro, do emprendemento e da competitividade económica de Galicia, que queda redactado como segue:

“1.- Aprobar anualmente un informe sobre os plans de desenvolvemento e apoio no que se indiquen os resultados obtidos e a consecución de obxectivos nas materias que son competencia da Consellería de Economía e Industria: emprendemento, innovación, competitividade, internacionalización, comercio interior e exterior, desenvolvemento industrial, enerxético e mineiro, e se propoñan as directrices de apoio ás actividades para persoas físicas e xurídicas e as cautelas para garantir, nos termos que regulamentariamente se establezan, que as empresas se creen, maduren, se expandan e consoliden a nivel nacional e internacional. “

Artigo 52.- *Comunicación previa ao inicio de actividade.*

Modifícase a alínea 2 do artigo 24 da Lei 9/2013, do 19 de decembro, do emprendemento e da competitividade económica de Galicia, que queda redactado como segue:

“2. Se para o desenvolvemento da actividade é precisa a realización dunha obra, a documentación anterior presentárase coa comunicación previa prevista na normativa urbanística ou coa solicitude de licenza de obra, se procedera. Logo de rematar a obra, presentárase comunicación previa para o inicio da actividade.”

CAPÍTULO IX *Cámaras Oficiais, Comercio e Minería*

SECCIÓN PRIMEIRA.- *Cámaras Oficiais de Comercio, Industria e Navegación*

Artigo 53.- *Funcións das cámaras.*

Modifícase o artigo 4 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 4. Funcións.

1. As Cámaras Oficiais de Comercio, Industria, Servizos e Navegación da Comunidade Autónoma de Galicia terán as funcións de carácter público-administrativo contempladas no artigo 5.1 da Lei 4/2014, do 1 de abril, de Cámaras Oficiais de Comercio, Industria, Servizos e Navegación.
2. Tamén corresponderá ás Cámaras Oficiais de Comercio, Industria, Servizos e Navegación da Comunidade Autónoma de Galicia desenvolver as funcións público-administrativas que se enumeran a continuación, na forma e coa extensión que se determine, no seu caso, regulamentariamente.
 - a) Propoñer aos órganos competentes da Comunidade Autónoma de Galicia cantas reformas ou medidas consideren necesarias ou convenientes para o fomento do comercio, a industria, os servizos e a navegación.
 - b) Colaborar na elaboración, desenvolvemento, execución e seguimento dos plans que se deseñen para o incremento da competitividade do comercio, a industria, os servizos e a navegación.
 - c) Colaborar cos órganos competentes da Comunidade Autónoma de Galicia como órganos de apoio e asesoramento para a creación de empresas.
 - d) Colaborar cos órganos competentes da Comunidade Autónoma de Galicia mediante a realización de actuacións materiais para a comprobación do cumprimento dos requisitos legais e verificación de establecementos mercantís e industriais cumprindo co establecido na normativa xeral e sectorial vixente.
 - e) Elaborar as estatísticas, enquisas de avaliación e estudos que consideren necesarios para o exercicio das súas competencias.
 - f) Promover e cooperar na organización de feiras e exposicións.
 - g) Colaborar nos programas de formación establecidos por centros docentes públicos ou privados e, no seu caso, polos órganos competentes da Comunidade Autónoma de Galicia.
 - h) Informar os proxectos de normas emanados da Comunidade Autónoma de Galicia que afecten directamente aos intereses xerais do comercio, a industria, os servizos ou a navegación, nos casos e co alcance que o ordenamento xurídico determine.
 - i) Tramitar os programas públicos de axudas ás empresas nos termos que se establezan en cada caso, así como xestionar servizos públicos relacionados coas mesmas, cando a súa xestión corresponda á administración autonómica e sempre que así se estableza nas súas respectivas normas.
 - j) Colaborar coa administración competente informando os estudos, traballos e accións que se realicen para a promoción do comercio, a industria, os servizos e a navegación.
 - k) Contribuír á promoción do turismo no marco da cooperación e colaboración cos órganos competentes da Comunidade Autónoma de Galicia.

- l) Colaborar cos órganos competentes da Comunidade Autónoma de Galicia para facilitar información e orientación sobre o procedemento de avaliación e acreditación para o recoñecemento das competencias profesionais adquiridas por experiencia laboral, así como na achega de instalacións e servizos para a realización dalgunhas fases do procedemento, cando as devanditas administracións o establezan.
 - m) As Cámaras Oficiais de Comercio, Industria, Servizos e Navegación da Comunidade Autónoma de Galicia tamén poderán desenvolver calquera outra función que os órganos competentes da Comunidade Autónoma de Galicia, no exercicio das súas competencias, consideren necesarias.
 3. As Cámaras Oficiais de Comercio, Industria, Servizos e Navegación da Comunidade Autónoma de Galicia poderán levar a cabo outras actividades, que terán carácter privado e se prestarán en réxime de libre competencia, que contribúan á defensa, apoio ou fomento do comercio, a industria, os servizos e a navegación, ou que sexan de utilidade para o desenvolvemento das indicadas finalidades e, en especial, establecer servizos de información e asesoramento empresarial. Así mesmo, poderán difundir e impartir formación en relación coa organización e xestión da empresa; prestar servizos de certificación e homologación das empresas e crear, xestionar e administrar bolsas de franquía, de subprodutos, de subcontratación e de residuos, así como lonxas de contratación, cumprindo os requisitos esixidos na normativa sectorial vixente para o exercicio destas actividades.

Tamén poderán desempeñar actividades de mediación, así como de arbitraje mercantil, nacional e internacional, de conformidade co establecido na lexislación vixente.
 4. Para o adecuado desenvolvemento das súas funcións, e previa autorización do órgano competente da Administración autonómica en materia de Cámaras, as Cámaras Oficiais de Comercio, Industria, Servizos e Navegación da Comunidade Autónoma de Galicia poderán promover ou participar en toda clase de asociacións, fundacións e sociedades civís ou mercantís, así como celebrar os oportunos convenios de colaboración.

Para o outorgamento da devandita autorización deberá xustificarse a necesidade ou conveniencia da promoción ou participación prevista. Igualmente, o órgano competente da Administración autonómica en materia de Cámaras poderá denegar a autorización cando a Cámara solicitante non acredítase, con carácter previo, que a súa participación nas entidades e convenios sinalados non afectará ao mantemento do seu equilibrio orzamentario.
 5. A autorización a que fai referencia o apartado anterior non implicará, en ningún caso, a asunción de responsabilidade algunha, nin principal nin subsidiaria, por parte da Administración da Comunidade Autónoma de Galicia en relación aos dereitos e obrigas derivados das actuacións das Cámaras Oficiais de Comercio, Industria, Servizos e Navegación da Comunidade Autónoma de Galicia no ámbito das súas actividades privadas.

6. Para o adecuado desenvolvemento das súas funcións, as Cámaras Oficiais de Comercio, Industria, Servizos e Navegación da Comunidade Autónoma de Galicia, así como o Consello Galego de Cámaras, e as Administracións Públicas poderán celebrar convenios dos previstos polas letras c) e d) do artigo 4.1 do Texto Refundido da Lei de Contratos do Sector Público, aprobado polo Real Decreto Legislativo 3/2011, do 14 de novembro, cando se dean os supostos para iso, e celebrar contratos nos que as Administracións Públicas se acomodarán ás prescricións do citado Texto Refundido e servirse dos restantes instrumentos permitidos polo ordenamento xurídico vixente. No desenvolvemento das funcións público-administrativas garantirase unha adecuada coordinación coas Administracións Públicas mediante a sinatura dos oportunos instrumentos de colaboración, así como a través dos Plans de actuacións que, no seu caso, diten os órganos competentes da Comunidade Autónoma de Galicia por razón da materia. Así mesmo, as Cámaras Oficiais de Comercio, Industria, Servizos e Navegación da Comunidade Autónoma de Galicia e o Consello Galego de Cámaras poderán subscribir convenios ou outros instrumentos de colaboración para garantir unha adecuada coordinación das súas actuacións coas levadas a cabo polas organizacións empresariais.
7. No desenvolvemento das funcións público-administrativas, as Cámaras garantirán a súa imparcialidade e transparencia.
8. No desenvolvemento das funcións público-administrativas, as Cámaras axustaranse ao previsto na Lei 3/1983, do 15 de xuño, de normalización lingüística de Galicia.
9. No desenvolvemento de todas as actividades, as Cámaras Oficiais de Comercio, Industria, Servizos e Navegación da Comunidade Autónoma de Galicia, así como o Consello Galego de Cámaras, respectarán as condicións de accesibilidade das persoas con discapacidade nos termos que estableza a normativa de aplicación.

A información que se facilite, baixo calquera formato, e en xeral, os servizos de atención ao destinatario e as súas instalacións deberán ser accesibles ás persoas con discapacidade, para o cal, terase en conta as necesidades dos distintos tipos de discapacidade, poñendo a disposición os medios e os apoios e realizando os axustes razoables que sexan precisos.”

Artigo 54.- *Ámbito territorial das cámaras.*

Modifícase o artigo 7 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 7. *Ámbito territorial*

1. Poderán existir Cámaras Oficiais de Comercio, Industria, Servizos e Navegación de ámbito autonómico, provincial e local, podendo coexistir Cámaras de distinto ámbito territorial.

2. En cada provincia existirá ao menos unha Cámara Oficial de Comercio, Industria, Servizos e, no seu caso, Navegación, sen prexuízo de que a súas funcións e servizos podan desempeñarse por outra das Cámaras Oficiais de Comercio, Industria, Servizos e Navegación da Comunidade Autónoma de Galicia. Neste sentido, as funcións e servizos dunha Cámara poderán ser asumidas por calquera das restantes Cámaras da Comunidade Autónoma de Galicia, nos supostos e co alcance que se determinen na presente Lei e na súa normativa de desenvolvemento.”

Artigo 55.- *Requisitos creación de Cámaras.*

Modifícase o artigo 8 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 8. Requisitos e supostos de creación de Cámaras

1. A creación de novas Cámaras Oficiais de Comercio, Industria, Servizos e Navegación unicamente poderá realizarse sobre a base de intereses comerciais, industriais, de servizos e navieiros específicos e sempre que a Cámara resultante conte con recursos suficientes para o cumprimento satisfactorio das súas funcións e non supoña mingua na calidade dos servizos que viñan sendo prestados.
2. Poderán crearse novas Cámaras Oficiais de Comercio, Industria, Servizos e Navegación:
 - a) Por fusión de dúas ou máis Cámaras. O procedemento iniciarase cos acordos, pola maioría absoluta dos membros dos plenos, favorables á fusión das distintas Cámaras afectadas.
 - b) Por integración dunha ou máis Cámaras. Pode iniciarse o procedemento cando unha cámara, durante catro exercicios consecutivos, liquide cun déficit superior ao 20% dos seus ingresos ou cando a administración tutelante, tendo en conta os intereses xerais do comercio, industria, servizos e navegación da Comunidade Autónoma de Galicia e previo informe do Consello Galego de Cámaras, o considere conveniente.”

Artigo 56.- *Demarcacións territoriais das cámaras.*

Modifícase o artigo 10 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 10. Modificación de demarcacións territoriais

O Consello da Xunta de Galicia poderá alterar a demarcación territorial das Cámaras Oficiais de Comercio, Industria, Servizos e Navegación da Comunidade Autónoma de Galicia:

- a) Cando estas, conxuntamente, así o acorden por maioría de dous terzos dos membros dos seus respectivos plenos.
- b) Cando o soliciten máis de dous terzos do electorado dos termos municipais a segregarse dunha Cámara, sempre que contén co acordo do pleno da Cámara á que haxan de ser agregados.
- c) Cando, como consecuencia dun proceso de liquidación de Cámaras, sexa precisa a integración da súa demarcación territorial noutra Cámara.
- d) Cando a administración tutelante, tendo en conta os intereses xerais do comercio, a industria, os servizos e a navegación da Comunidade Autónoma de Galicia e previo informe do Consello Galego de Cámaras, o estime conveniente."

Artigo 57.- *Pleno das cámaras.*

Modifícase o artigo 14 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

"Artigo 14. Pleno

1. O Pleno é o órgano supremo de goberno e representación da Cámara, que estará composto por un número de vogais determinado no Regulamento de Réxime Interior de cada Cámara que en ningún caso será inferior a 10 nin superior a 60 vogais. O seu mandato durará catro anos.

2. O Pleno terá a seguinte composición:

- a) Vogais de elección directa que serán, como mínimo, dous terzos dos vogais do Pleno, elixidos mediante sufraxio libre, igual, directo e secreto entre todas as persoas físicas e xurídicas que exerzan unha actividade comercial, industrial, de servizos ou de navegación na demarcación, de acordo coa clasificación en grupos e categorías que se estableza regulamentariamente conforme aos criterios establecidos na lexislación básica estatal.
- b) Representantes das empresas e persoas de recoñecido prestixio na vida económica dentro da circunscrición de cada Cámara que realicen achegas voluntarias á mesma, efectivas e satisfeitas, a proposta das organizacións empresariais intersectoriais e territoriais máis representativas. A este fin, as citadas organizacións empresariais presentarán á administración tutelante unha lista de candidatos pro-

postos, en número que corresponda ás vogalías a cubrir. O número dos vogais deste grupo representará un sexto do número total dos vogais do pleno.

- c) Representantes das empresas de maior achega voluntaria na demarcación de cada Cámara. Estes vogais serán elixidos de entre as empresas que realizasen achegas económicas voluntarias, efectivas e satisfeitas e o seu número representará un sexto do número total dos vogais do pleno.

Para a determinación, elección e proclamación dos vogais previstos nas letras b) e c) do presente artigo, a Xunta Electoral requirirá un informe ao Secretario Xeral de cada Cámara. As empresas con achega económica voluntaria deberán adquirir o compromiso de manter as devanditas achegas ata a realización de novas eleccións. No caso de non manterse as devanditas achegas económicas, declararase a súa vacante no pleno e procederase á elección de novos membros do mesmo.

De non conseguir que se cubran os vogais previstos nas letras b) e c), ben por ausencia de empresas que realicen achegas voluntarias, ben porque as devanditas empresas non designasen representantes no Pleno, estas vacantes quedarán sen cubrir ata que existan empresas que se adhiran á Cámara co compromiso de realizar achegas voluntarias ou que as xa adheridas designen representantes no pleno, momento no que se cubrirán as vacantes mediante elección entre as devanditas empresas na forma prevista.

3. Poderán asistir ás reunións do pleno, con voz pero sen voto, as persoas de recoñecido prestixio da vida económica do ámbito territorial de demarcación da Cámara. A tal fin, o presidente propondrá aos vogais unha lista de candidatos que supere nun terzo o número de vogalías a elixir. O número de persoas a elixir conforme a este apartado non poderá exceder do 20% do total de vogais do Pleno.

4. Os vogais das letras a), b) e c) elixirán ao presidente da Cámara así como ás persoas de recoñecido prestixio previstas no apartado 3.

5. O secretario xeral e o director xerente, se o houbese, asistirán, con voz pero sen voto, as reunións do pleno.

6. A condición de membro do pleno é única e indelegable, non tendo carácter retribuído.

7. Os membros do pleno teñen o dereito e o deber de asistir ás sesións que o mesmo celebre.

8. O pleno cesa tras a convocatoria de eleccións, permanecendo en funcións ata a toma de posesión dos seus novos membros.

9. Regulamentariamente determinarase o réxime de provisión de vacantes no pleno.”

Artigo 58.- Dereito de sufraxio.

Suprímense os artigos 28 e 29 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia.

Artigo 59.- Censo electoral das cámaras.

Modifícase o artigo 30 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 30. Censo electoral

1. O censo electoral das Cámaras estará constituído pola totalidade das persoas físicas ou xurídicas, nacionais ou estranxeiras, que exerzan as actividades comerciais, industriais, de servizos ou navieiras non excluídas de conformidade co artigo 7 da Lei 4/2014, do 1 de abril, Básica das Cámaras Oficiais de Comercio, Industria, Servizos e Navegación. Este censo elaborárase e revisárase anualmente polo comité executivo, con referencia ao 1 de xaneiro.
2. O censo electoral das Cámaras, constituído de acordo co establecido no apartado 1 deste artigo, comprenderá a totalidade dos seus electores, clasificados por grupos e categorías, en atención á importancia económica dos diversos sectores representados, na forma que determine a administración tutelante, clasificación que se revisará, cada catro anos, polo comité executivo.

Os integrantes do censo electoral terán dereito de voto para a elección dos órganos de goberno das Cámaras Oficiais de Comercio, Industria, Servizos e Navegación dentro de cuxa circunscrición teñan establecementos, delegacións ou axencias.

Para ser elector, xa sexa en nome propio ou en representación de persoas xurídicas, requirirase maioría de idade e non estar incurso en ningunha causa legal que impida a devandita condición.
3. Os candidatos a formar parte dos órganos de goberno das Cámaras deberán, ademais, ter a nacionalidade española ou dun Estado membro da Unión Europea, a dun Estado parte no Acordo sobre o Espazo Económico Europeo, ou a dun Estado a cuxos nacionais se estenda, en virtude do correspondente Acordo ou Tratado Internacional, o réxime xurídico previsto para os cidadáns anteriormente citados, levar como mínimo dous anos de exercicio na actividade empresarial nos territorios citados e acharse ao corrente no pago das súas obrigas tributarias e coa Seguridade Social.

As persoas doutra nacionalidade poderán ser candidatas de acordo co principio de reciprocidade, sempre que cumpran os demais requisitos esixidos no parágrafo anterior.

4. Para ser candidato a formar parte do pleno será necesario, ademais, estar incluído no censo electoral dentro do grupo e categoría por cuxa representación se opta.

As persoas naturais ou xurídicas que exerzan actividades correspondentes a diversos grupos ou diversas categorías do mesmo grupo do censo dunha cámara teñen dereito de sufraxio activo e pasivo en cada un dos mesmos. Se resultasen elixidas en máis dun grupo ou categoría deberán optar pola representación nos órganos de goberno de só un deles.

5. Para os efectos da elección dos vogais previstos na letra b) do apartado 2 do artigo 14, as Cámaras elaborarán un censo de empresas de maior achega voluntaria en cada demarcación.”

Artigo 60.- *Ingresos das cámaras.*

Modifícase o artigo 38 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 38. Réxime económico

1. As Cámaras Oficiais de Comercio, Industria, Servizos e Navegación da comunidade Autónoma de Galicia disporán dos seguintes ingresos:
 - a) Os ingresos ordinarios e extraordinarios obtidos polos servizos que presten e, en xeral, polo exercicio das súas actividades.
 - b) Os produtos, rendas e incrementos do seu patrimonio.
 - c) As achegas voluntarias de empresas ou entidades comerciais.
 - d) Os legados e donativos que puideran recibir.
 - e) Os procedentes das operacións de crédito que se realicen.
 - f) Calquera outros que lles poidan ser atribuídos por Lei, en virtude de convenio ou por calquera outro procedemento de conformidade co ordenamento xurídico.
2. A disposición de bens patrimoniais deberá contar coa autorización da administración tutelante cando se trate de bens inmobles. A administración tutelante poderá determinar outros supostos en que sexa precisa a súa autorización para a disposición por parte das Cámaras doutro tipo de bens patrimoniais, en función do seu alcance económico.”

Artigo 61.- *Recurso cameral.*

Suprímense os artigos 39, 40, 41 e 43 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia.

Artigo 62.- *Réxime económico e orzamentario das cámaras.*

Modifícase o artigo 56 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 56. Réxime económico e orzamentario.

1. Os ingresos permanentes do Consello Galego de Cámaras estarán constituídos polas contribucións das cámaras na contía que fixe anualmente o consello ao aprobar os seus orzamentos.
2. O réxime económico e orzamentario, no que sexa compatible, rexeráse polo disposto no capítulo V da presente Lei.”

Artigo 63.- *Tutela das cámaras.*

Modifícase o artigo 58 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 58.- Tutela

1. As Cámaras Oficiais de Comercio, Industria, Servizos e Navegación da Comunidade Autónoma de Galicia, así como o Consello Galego de Cámaras, están suxeitas no exercicio da súa actividade á tutela da Administración da Comunidade Autónoma de Galicia, a través da Consellería Competente en materia de Comercio.
2. A función de tutela comprende o exercicio das potestades administrativas de aprobación, fiscalización, resolución de recursos, suspensión, disolución e extinción.
3. Nos supostos de disolución, liquidación e extinción previstos nesta lei, a función de tutela comprenderá o coñecemento e dirección do correspondente procedemento así como a adopción das medidas necesarias para garantir a prestación dos servizos propios das Cámaras sen que a Administración tutelante quede directa ou indirectamente vinculada polos saldos debedores derivados da liquidación dos cales responderá exclusivamente o patrimonio da Cámara extinguida.
4. O exercicio das funcións de tutela non implicará, en ningún caso, a asunción de responsabilidade algunha, nin principal nin subsidiaria, por parte da Administración tutelante en relación aos dereitos e obrigas derivados das actuacións das Cámaras de Comercio no ámbito das súas actividades.

5. As relacións laborais quedan fora da tutela por parte da Administración e están suxeitas ao ámbito de xestión das Cámaras.
6. A Administración da Comunidade Autónoma de Galicia disporá dun período de dous meses a partir da entrada no órgano competente das solicitudes formais das Cámaras para a resolución destas, salvo naqueles casos en que a presente Lei prevexa prazos distintos.”

Artigo 64.- *Suspensión e disolución dos órganos de goberno das cámaras.*

Modifícase o artigo 61 da Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que queda redactado como segue:

“Artigo 61.- Suspensión e disolución dos órganos de goberno das cámaras.

1. A administración tutelante poderá suspender a actividade dos órganos de goberno das Cámaras no caso de que se produzan transgresións do ordenamento xurídico vixente que, pola súa gravidade ou reiteración, fagan aconsellable esta medida, así como nos supostos de imposibilidade de funcionamento normal de aqueles.
A estes efectos, concederáse un prazo de quince días á cámara afectada e ao Consello Galego de Cámaras para que efectúen as alegacións que estimen convenientes, podendo reducirse o devandito prazo a cinco días naqueles casos en que o transcurso daquel prazo poida levar consigo prexuízos de imposible ou difícil reparación.
2. O acordo de suspensión determinará o seu prazo de duración, que non poderá exceder de tres meses, así como o órgano xestor que terá as funcións de xestión ordinaria e defensa dos intereses da Cámara e que estará composto por representantes da administración tutelante e das cámaras, nun número non superior a 8 vogais entre os cales escolleráse un Presidente e un Secretario.
3. Se, transcorrido o prazo de suspensión, subsistisen as razóns que deron lugar á mesma, procederáse, dentro do prazo dun mes, á disolución dos órganos de goberno das Cámaras, así como á convocatoria de novas eleccións, manténdose nas súas funcións, ata a constitución dos novos órganos camerais, o órgano designado.”

Artigo 65.- *Extinción das cámaras.*

Engádese un artigo 62 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, co seguinte contido:

“Artigo 62.- Extinción

Procederá a iniciación do procedemento de extinción de Cámaras cando, de conformidade co artigo 37.3 da Lei 4/2014, do 1 de abril, Básica das cámaras oficiais de comercio, industria, servizos e navegación, non sexa posible a celebración de eleccións e a constitución dos órganos de goberno da respectiva Cámara.

Considerarase que concorre este suposto cando trala disolución dos órganos de goberno da respectiva Cámara e correspondente convocatoria de eleccións, non se presentase ningunha candidatura válida no prazo establecido ao efecto.”

Artigo 66.- *Iniciación do procedemento de disolución das cámaras.*

Engádesse un artigo 63 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, co seguinte contido:

“Artigo 63.- Iniciación do procedemento de disolución

- I. O órgano tutelante previa audiencia á Cámara afectada e ao Consello Galego de Cámaras, ditará acordo de inicio do procedemento de disolución cando concorra o suposto sinalado no artigo 62.

A devandita resolución será obxecto de publicación no Diario Oficial de Galicia e na páxina web do Consello Galego de Cámaras e, de ser posible, na páxina web da propia Cámara afectada tendo o seguinte contido mínimo:

- Mantemento do órgano xestor no exercicio das súas funcións ata a apertura da fase de liquidación.
- Designación dun administrador independente, que poderá ser unha persoa física ou xurídica, que realizará as funcións establecidas nesta lei. A designación do administrador independente axustarase aos principios de publicidade e transparencia.
- Chamamento aos posibles acredores da Cámara para que poñan en coñecemento do xestor a existencia de créditos ao seu favor, todo iso no prazo dun mes a contar dende o día seguinte ao da publicación.”

Artigo 67.- *Determinación do inventario e relación de créditos.*

Engádesse un artigo 64 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, co seguinte contido:

“Artigo 64.- Determinación do inventario de activos e da relación de créditos e acredores

1. O administrador elaborará no prazo máximo dun mes dende o seu nomeamento, un inventario que conterá a relación e a valoración dos bens e dereitos da Cámara, con expresión da súa natureza, características, gravames, trabas, cargas e calquera outros elementos relevantes a efectos da súa identificación e valoración, que en todo caso realizárase conforme ao seu valor de mercado.
2. O administrador elaborará no prazo máximo de 45 días dende o seu nomeamento, unha relación de acredores e dos seus respectivos créditos fronte as Cámaras, todos eles computados en diñeiro e expresados en moeda de curso legal. Esta relación recollerá nome, domicilio e demais datos de identidade do acredor, así como os relativos ao crédito, seu concepto, contía, datas de adquisición e vencemento, características, garantías e calquera outros elementos relevantes a efectos da súa identificación e valoración.”

Artigo 68.- *Fase de liquidación das cámaras.*

Engádesse un artigo 65 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, co seguinte contido:

“Artigo 65.-Fase de liquidación

1. Determinados o inventario de activos e a relación de créditos e acredores previstos no artigo anterior, a administración tutelante a instancia do órgano xestor acordará a apertura da fase de liquidación e será obxecto, no seu caso, de notificación aos acredores comparecidos no procedemento e aos órganos xurisdicionais que estean coñecendo de causas pendentes, así como de publicación no Diario Oficial de Galicia e na páxina web do Consello Galego de Cámaras e, de ser posible, na páxina web da propia cámara afectada.
2. O acordo de apertura terá o seguinte contido mínimo:
 - a) Deber de incorporar á denominación da Cámara a expresión “en liquidación”.
 - b) Cesamento do órgano xestor e encomenda da actividade de liquidación da cámara ao administrador independente.
 - c) Medidas necesarias para garantir que as persoas físicas e xurídicas do ámbito territorial da Cámara a extinguir reciban os servizos propios das Cámaras. A estes efectos abrírase un prazo de 10 días hábiles para que as restantes cámaras de Galicia realicen propostas para a asunción das funcións da Cámara a extinguir.
A asunción de funcións da cámara a extinguir por outra cámara de Galicia e a conseguinte modificación da demarcación cameral territorial realizarase mediante decreto do Consello da Xunta, a proposta da Administración tutelante, tendo en

conta a concorrencia e os principios de viabilidade, solvencia e proximidade por este orde.

3. Durante o período de liquidación corresponderá ao administrador independente a xestión e a defensa dos intereses da cámara.
4. En particular, correspondente ao administrador independente:
 - a) A representación da cámara en todos os actos xurídicos e exercitar dereitos e accións que a ela correspondan.
 - b) Concluir as operacións pendentes da Cámara e realizar as novas que sexan necesarias para a liquidación.
 - c) Realizar as operacións de liquidación, percibindo os créditos e pagando as débedas da cámara.
 - d) Propoñer a alienación dos bens da cámara, que requirirá previa autorización da administración tutelante nos casos previstos no artigo 38.2
 - e) Informar periodicamente á administración tutelante do estado da liquidación.
 - f) Levar e custodiar a contabilidade da cámara, os libros, a documentación e correspondencia desta.
 - g) A dirección e xestión do persoal da cámara.
 - h) En xeral, realizar todas aquelas actuacións que sexan necesarias para a liquidación da cámara e adecuadas aos intereses da mesma.
5. Finalizadas as operacións de liquidación, o administrador independente remitirá á Administración tutelante informe completo sobre as devanditas operacións e un balance final.
6. O administrador independente será responsable de calquera prexuízo que se tivese causado con dolo ou culpa no desempeño do seu cargo.”

Artigo 69.- *Fase de extinción das cámaras.*

Engádesse un artigo 66 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que terá a seguinte redacción:

“Artigo 66.- Fase de Extinción

1. Concluídas as operacións de liquidación e recibido o correspondente informe e o balance final, a administración tutelante elevará unha proposta de extinción ao Consello da Xunta, no que se incluírán os seguintes extremos:
 - a) Aprobación do informe e o balance final presentado polo administrador independente.
 - b) Declaración de extinción da Cámara.

- c) Pronunciamento sobre o destino dos bens e dereitos resultantes do procedemento de liquidación que, no seu caso, puideran existir.
 - d) Determinación do órgano que asumirá as funcións da cámara a extinguir, de conformidade co previsto no artigo 67.
2. O acordo de extinción realizarase por Decreto do Consello da Xunta de Galicia e publicarase no Diario Oficial de Galicia.”

Artigo 70.- *Asunción de funcións das cámaras.*

Engádesse un artigo 67 na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que terá a seguinte redacción:

“Artigo 67.- Asunción de funcións

1. O exercicio das funcións da Cámara que se extingue será asignado a unha das restantes Cámaras galegas polo Decreto do Consello da Xunta de Galicia. Se a Cámara a extinguir tivese ámbito uniprovincial deberá manterse unha delegación no seu territorio para garantir a proximidade na prestación de servizos.
2. A cámara que asuma as funcións da cámara que se extingue deberá axustar, cando así se determine, a súa denominación e órganos de goberno ao novo ámbito territorial.”

Artigo 71.- *Réxime transitorio.*

Engádesse unha disposición transitoria cuarta na Lei 5/2004, do 8 de xullo, de Cámaras Oficiais de Comercio, Industria e Navegación de Galicia, que terá a seguinte redacción:

“Cuarta

A composición dos órganos xestores que teñan encomendadas as funcións de xestión ordinaria e defensa dos intereses de aquelas Cámaras cuxos órganos de goberno se encontren suspendidos deberá adaptarse ás previsións do artigo 61 no prazo máximo de quince días dende a entrada en vigor desta norma.”

SECCIÓN SEGUNDA *Comercio Interior de Galicia.*

Artigo 72.- *Autorización comercial autonómica.*

Modifícase o artigo 32 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 32.- Procedemento para a obtención da autorización comercial autonómica e a súa valoración

1. A autorización comercial autonómica será concedida mediante resolución da persoa titular da consellaría competente en materia de comercio con carácter previo á obtención da licenza de obra municipal, así como á obtención de calquera outra licenza ou permiso doutra entidade ou administración que sexan esixibles, se é o caso.
2. A concesión da autorización comercial autonómica estará fundamentada nos seguintes criterios de interese xeral, cuxo cumprimento estará debidamente xustificado no proxecto:
 - a) A adecuación da nova implantación aos instrumentos de ordenación do territorio que, se é o caso, resulten de aplicación.
 - b) A viabilidade urbanística, tendo en conta a plena concordancia do establecemento proxectado coas determinacións establecidas no plan xeral e os instrumentos de desenvolvemento e xestión urbanística e o resto de normas de competencia municipal.
 - c) O axeitado cumprimento da normativa reguladora en materia de accesibilidade, circulación e mobilidade contidas no proxecto e a previsión de mellora das infraestruturas que permitan a fluidez do tráfico rodado xerado pola implantación comercial no suposto de que as existentes non resulten axeitadas.
 - d) A disposición de, polo menos, unha praza de aparcadoiro por cada 20 m² de superficie útil de exposición e venda ao público. Esta previsión será desenvolvida mediante regulamento, cuxa aprobación condicionará o momento de entrada en vigor desta establecendo os supostos en que poderá excepcionarse este criterio de valoración. Así mesmo, deberá preverse a reserva de prazas para persoas discapacitadas nos termos que establece a normativa vixente.
 - e) O establecemento de liñas de transporte colectivo que desconxestionen o tráfico rodado e permitan acceder en axeitadas condicións de regularidade e intensidade á implantación comercial cando as existentes non resulten suficientes.
 - f) A viabilidade e legalidade ambiental do proxecto con cumprimento da normativa vixente en materia ambiental, que contemplará a adopción de medidas positivas de protección ambiental que reduzan a contaminación acústica, a emisión de gases de efecto invernadoiro e a produción de residuos, e a súa xestión mediante procedementos de valorización, preferentemente mediante reciclaxe e reutilización, e a utilización da auga, a enerxía, as materias primas e outros recursos de xeito eficiente. Este criterio acreditarase do modo establecido na letra b) do apartado 3 do presente artigo.
3. Completada a documentación, o órgano instrutor solicitará os informes seguintes:
 - a) Informe da consellaría competente en materia de ordenación do territorio e urbanismo sobre o cumprimento dos criterios establecidos na letra a) do apartado anterior.

- b) Declaración de impacto ambiental, que constituirá a acreditación do cumprimento do criterio f) do apartado anterior.
- Para estes efectos, os proxectos de instalación de establecementos comerciais precisados de autorización comercial autonómica someteranse en todo caso aos trámites de avaliación de impacto ambiental. O procedemento correspondente quedará integrado no de outorgamento da autorización comercial, sendo o órgano substantivo a consellaría competente en materia de comercio. Durante a tramitación da avaliación de impacto enténdese suspendido o procedemento para resolver a autorización autonómica.
- c) Informe da consellaría competente en materia de transporte sobre a existencia ou suficiencia do transporte interurbano previsto no criterio e) do apartado anterior.
- d) Informe do concello en cuxo termo municipal se pretenda emprazar o establecemento comercial, que deberá pronunciarse sobre o cumprimento dos criterios b), c), d) e e) do apartado anterior, ademais do cumprimento de todas as normas que habilitan a apertura do establecemento.
4. Transcorridos dous meses dende que se teña constancia da recepción da petición de cada informe sen que existise pronunciamento expreso para o efecto, poderán proseguirse as actuacións, presumíndose favorables. Non obstante, no suposto de ausencia do informe previsto na letra d), poderá ser solicitada a información complementaria que resulte precisa e que obre a disposición da consellaría competente en materia de urbanismo e transporte.
5. Emitidos os anteriores informes, o expediente remitirase á Comisión Consultiva prevista no artigo 20º. 3 da presente lei ao obxecto de que efectúe a proposta de resolución. A Comisión Consultiva poderá neste trámite solicitar ampliación ou aclaracións dos informes emitidos.
6. O prazo para resolver o procedemento de autorización comercial autonómica será de tres meses dende que teña entrada no rexistro do órgano competente para a súa tramitación a documentación completa, incluído o xustificante de aboamento das correspondentes taxas. Transcorrido o prazo para resolver o procedemento sen que recaese resolución expresa, a solicitude entenderase estimada por silencio administrativo.
7. Regulamentariamente establecerase o procedemento de concesión da autorización comercial autonómica prevista na presente lei.”

Artigo 73.- *Sección comerciantes ambulantes.*

Modifícase o artigo 73 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 73.- Sección de comerciantes ambulantes do Rexistro Galego de Comercio

1. Para os meros efectos estatísticos existirá unha sección de comerciantes ambulantes no Rexistro Galego de Comercio regulado no artigo 8º da presente lei.
2. A inscrición na correspondente sección do Rexistro Galego de Comercio será voluntaria para a persoa comerciante e terá carácter previo ao inicio da actividade, debendo achegarse a documentación seguinte:
 - a) O DNI ou pasaporte, se o interesado é persoa física; o CIF, acta de constitución, estatutos e escritura de poder outorgada a favor da persoa que asina a solicitude de inscrición en representación da empresa, se é persoa xurídica.
 - b) A certificación de alta no réxime correspondente da Seguridade Social e, no seu caso, no imposto de actividades económicas.
3. A inscrición na sección de vendedores ambulantes do Rexistro Galego de Comercio terá unha vixencia de cinco anos renovables. A non inscrición ou renovación non constituirá impedimento ningún para o exercicio da venda ambulante.
4. A Administración autonómica expedirá unha tarxeta de persoa vendedora ambulante, logo de inscrición no Rexistro Galego de Comercio, con vixencia de cinco anos. Na tarxeta deberá constar
 - a) A identificación da persoa titular.
 - b) A identificación da persoa traballadora para a que se expide a tarxeta
 - c) A data de expedición e caducidade.
 - d) A descrición literal do epígrafe no que figura dada de alta.
 - e) O número de inscrición no rexistro.

A tarxeta será outorgada á persoa física ou xurídica titular da actividade, sendo expedidas de forma nominativa para cada unha das súas persoas traballadoras, sempre que estas últimas acrediten unha cotización como vendedoras ambulantes de polo menos dezaseis horas semanais na Seguridade Social no réxime que corresponda.

Para os efectos de simplificación administrativa, a tarxeta servirá como acreditación dos extremos sinalados no apartado 2 do presente artigo ante os correspondentes concellos. No suposto de que a persoa vendedora ambulante non opte voluntariamente pola inscrición na sección do rexistro, será o concello que autorice o exercicio da venda ambulante quen comunique os datos para a correspondente inscrición.”

Artigo 74.- Feiras de oportunidades.

Modifícase o artigo 94 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 94. Feiras de oportunidades celebradas por persoas comerciantes

1. Enténdese por feiras de oportunidades aquelas de carácter multisectorial promovidas por persoas comerciantes ou polas súas estruturas asociativas e celebradas fóra dos seus respectivos establecementos comerciais, permanentes ou fixos, en lugares do núcleo urbano habilitados para o efecto polo respectivo concello.
2. A celebración das feiras de oportunidades requirirá comunicación previa á dirección xeral competente en materia de comercio, que deberá realizarse cunha antelación mínima dun mes á data de desenvolvemento da feira. Na devandita comunicación indícarase o número de postos a instalar, as persoas comerciantes participantes e o municipio onde desenvolven a súa actividade, os produtos obxecto de venda, así como a duración e situación da feira e a dimensión espacial desta e de cada un dos postos. Así mesmo, deberá achegarse a correspondente comunicación previa ou declaración responsable ao respectivo concello e o informe da Mesa Local do Comercio do concello ou concellos que integren a comarca se o ámbito territorial da feira é comarcal.
3. As feiras de oportunidades terán por obxecto a celebración de vendas en condicións máis vantaxosas das habituais, resultándolles de aplicación o disposto no capítulo I do título IV da presente lei.
4. As dúas terceiras partes das persoas comerciantes participantes na feira de oportunidades deberán exercer a súa actividade no respectivo municipio ou bisbarra, se o ámbito territorial da feira é comarcal, non podendo ocupar ningunha delas máis dunha décima parte da dimensión espacial da feira.
5. As feiras de oportunidades terán unha duración máxima de tres días, podendo celebrarse unicamente unha vez ao ano, preferentemente en período de rebaixas. Excepcionalmente, logo de informe da Mesa Local do Comercio, poderá autorizarse pola dirección xeral competente en materia de comercio a realización dunha segunda feira de oportunidades no período dun ano.”

Artigo 75.- *Reincidencia na comisión de infraccións.*

Modifícase o artigo 107 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 107. Reincidencia.

1. Entenderase por reincidencia a comisión, no período de dous anos, de máis dunha infracción da mesma natureza, cando así fose declarado por resolución firme.
2. Malia o sinalado na alínea anterior, para cualificar unha infracción como moi grave só se atenderá á reincidencia en infraccións graves, e a reincidencia en infraccións leves só determinará que unha infracción deste tipo sexa cualificada como grave cando se

incorese en máis de dúas infraccións de carácter leve, cando así fose declarado por resolución firme”

Artigo 76.- *Gradación sancións.*

Modifícase o artigo 112 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 112. Gradación das sancións.

1. As sancións graduaranse tendo en conta os seguintes factores:
 - a) A transcendencia social da infracción.
 - b) A natureza dos prexuízos causados.
 - c) O volume da facturación á que afecta.
 - d) O grao de voluntariedade ou a intencionalidade da persoa infractora.
 - e) A contía do beneficio obtido.
 - f) A capacidade ou a solvencia económica da empresa.
 - g) O prazo de tempo durante o que se viñese cometendo a infracción.
 - h) A reincidencia.
 - i) A superficie de venda do establecemento.
 - j) A pertenza a unha gran empresa ou grupo de empresa.
2. Cando o beneficio que resulte dunha infracción sexa superior á sanción que lle corresponda, esta poderase incrementar na contía equivalente ao beneficio obtido.
3. Regulamentariamente poderán introducirse especificacións ou gradacións ao cadro de infraccións ou sancións establecidas nesta lei que, sen constituíren novas infraccións e sancións, nin alteraren a natureza ou os límites das que considera a lei, contribúan á máis correcta identificación dos tipos de infracción ou a unha máis precisa determinación das sancións correspondentes.”

Artigo 77.- *Órganos con competencias sancionadoras.*

Modifícase o artigo 113 da Lei 13/2010, do 17 de decembro, de Comercio Interior de Galicia, que queda redactado como segue:

“Artigo 113 Órganos competentes para a imposición das sancións

1. A competencia para iniciar os procedementos sancionadores derivados das infraccións tipificadas na presente lei corresponderá a quen ostente a titularidade das respectivas xefaturas territoriais da consellaría competente en materia de comercio.

2. Non obstante, a devandita competencia corresponderá á dirección xeral competente en materia de comercio no caso de infraccións administrativas que afecten ao ámbito territorial de dous ou máis provincias da Comunidade Autónoma galega.
3. A competencia para a resolución dos expedientes sancionadores corresponderá:
 - a) Nos supostos de infraccións moi graves, ao Consello da Xunta de Galicia.
 - b) Nos supostos de infraccións graves, a quen ostente a titularidade da consellaría competente en materia de comercio.
 - c) Nos supostos de infraccións leves, á persoa titular da xefatura territorial correspondente da consellaría competente en materia de comercio, cando afectasen unicamente ao seu respectivo ámbito territorial, e á persoa titular da dirección xeral competente en materia de comercio nos casos de infraccións que afectasen ao ámbito territorial de dous ou máis provincias do territorio galego.
4. As infraccións tipificadas no artigo 105º.a).1), no concemente á licenza municipal de apertura e as infraccións tipificadas nos artigos 104, 105 e 106 relativas á venda ambulante ou non sedentaria, sancionaranse polas persoas titulares das alcaldías, de conformidade co previsto na presente lei.”

SECCIÓN TERCEIRA *Minaría*

Artigo 78.- *Ámbito de aplicación.*

Engádesse unha nova letra d) ao artigo 2 da Lei 3/2008, do 23 de maio, de ordenación da minaría de Galicia, co seguinte contido:

“d) Calquera aproveitamento de recursos xeotérmicos de escasa importancia económica, en particular aos que se lle dea utilidade en calefacción, climatización doméstica ou industrial e/ou auga quente sanitaria, baseados en sistemas xeotérmicos de moi baixa entalpía, con intercambiadores en circuíto pechado, ata 200 metros de profundidade, sempre que se leve a cabo polo propietario do terreo para o seu uso exclusivo e cuxo aproveitamento non esixa a aplicación de técnica mineira algunha.”

Artigo 79.- *Solicitudes de dereitos mineiros.*

Un.- Modifícase a letra k) da alínea I do artigo 17 da Lei 3/2008, do 23 de maio, de ordenación da minaría de Galicia, que queda redactado como segue:

“k) Certificado municipal sobre a situación urbanística do lugar onde se pretende levar a cabo a explotación.”

Dous.- Engádese unha nova letra l) a alínea l do artigo 17 da Lei 3/2008, do 23 de maio, de ordenación da minaría de Galicia, co seguinte contido:

“l) Calquera outra documentación e información acreditativa do cumprimento de requisitos establecidos na lexislación sectorial de aplicación.”

Artigo 80.- *Informe municipal.*

Modifícase o artigo 22 da Lei 3/2008, do 23 de maio, de ordenación da minaría de Galicia, que queda redactado como segue:

“ Artigo 22. Informe municipal preceptivo

O municipio que teña situado o dereito mineiro no seu termo municipal emitirá un informe preceptivo e determinante sobre as cuestións de competencia municipal. O devandito informe deberá emitirse no prazo de dous meses desde a recepción do expediente.”

Artigo 81.- *Informe autonómico.*

Modifícase o artigo 23 da Lei 3/2008, do 23 de maio, de ordenación da minaría de Galicia, que queda redactado como segue:

“Artigo 23. Informes autonómicos preceptivos

O órgano mineiro competente remitirá aos órganos ambiental, urbanístico e agrario da comunidade autónoma a solicitude de dereitos mineiros para que emitan informe preceptivo e determinante que acredite unha xestión mineira compatible co medio ambiente e o patrimonio cultural e coa planificación urbanística e territorial, así como coa ordenación agraria.

O informe emitido polo órgano urbanístico terá carácter de vinculante, e equivalerá á autorización urbanística autonómica.

Os devanditos informes deberán emitirse no prazo de dous meses desde a recepción do expediente completo.”

CAPÍTULO X *Servizos sociais*

Artigo 82.- *Silencio administrativo.*

Un.- Modifícase o prazo establecido na disposición adicional sexta da Lei 13/2008, do 3 de decembro, de servizos sociais de Galicia, que pasa de seis a tres meses.

Dous.- Engádese a disposición adicional Sexta bis na Lei 13/2008, do 3 de decembro, de servizos sociais de Galicia, co seguinte contido:

“ Sexta bis. Falta de resolución expresa no procedemento para a elaboración do Programa Individual de Atención, nos procedementos de revisión de grao de dependencia e do Programa Individual de Atención a instancia de parte, e no procedemento de recoñecemento do dereito á efectividade das prestacións económicas das persoas solicitantes falecidas, na Comunidade Autónoma de Galicia.

1. A todos os efectos legais, entenderase que o procedemento para a elaboración do Programa Individual de Atención establecido no marco do procedemento de recoñecemento da situación de dependencia e as prestacións correspondentes, é un procedemento iniciado de oficio.
2. No caso do procedemento de revisión do grao de dependencia iniciado a instancia de parte, e do procedemento de revisión do Programa Individual de Atención iniciado a instancia de parte, o vencemento do prazo máximo sen terse notificado resolución expresa lexítima ao interesado que tivese deducido a solicitude para tela desestimada por silencio administrativo.
3. No caso do procedemento de recoñecemento do dereito á efectividade das prestacións económicas das persoas solicitantes falecidas regulado no Decreto 15/2010, de 4 de febreiro, o vencemento do prazo máximo sen terse notificado resolución expresa lexítima ao interesado que tivese deducido a solicitude para tela desestimada por silencio administrativo.”

Tres.- Engádese a disposición adicional Sexta ter na Lei 13/2008, do 3 de decembro, de servizos sociais de Galicia, co seguinte contido:

“Sexta ter. Falta de resolución expresa no procedemento de declaración e cualificación do grao de discapacidade na Comunidade Autónoma de Galicia.

1. No procedemento de recoñecemento, cualificación e declaración do grao de discapacidade na Comunidade Autónoma de Galicia, o vencemento do prazo máximo sen terse notificado resolución expresa lexítima ao interesado que tivese deducido a solicitude para tela desestimada por silencio administrativo.
2. No procedemento de revisión da cualificación do grao de discapacidade iniciado a instancia de parte na Comunidade Autónoma de Galicia, o vencemento do prazo máximo sen terse notificado resolución expresa lexítima ao interesado que tivese deducido a solicitude para tela desestimada por silencio administrativo.”

Artigo 83.- *Colaboración no ámbito da prestación de servizos sociais a través da Axencia Galega de Servizos Sociais.*

Un.- Nos termos previstos na disposición adicional undécima da Lei 14/2013, do 26 de decembro, de racionalización do sector público autonómico, e no marco da disolución e liquidación do Consorcio Galego de Servizos de Igualdade e de Benestar, a administración pública autonómica fomentará a colaboración e cooperación sostible cos municipios para a prestación de servizos sociais a través da firma dos convenios de colaboración entre o consorcio, a axencia e os municipios previstos pola normativa vixente.

Dous.- Para estes efectos, os concellos que opten por formalizar os convenios de colaboración coa Axencia e o Consorcio para a xestión dos centros que ata ese momento estaban a ser xestionados polo Consorcio, en calquera momento anterior á extinción do Consorcio e simultáneo inicio da eficacia dos ditos convenios, poderán acollerse a unha liquidación das cantidades pendentes de pagamento por parte dos concellos ao Consorcio en virtude dos convenios de xestión asinados previamente co Consorcio, nos termos previstos no presente apartado.

Os concellos que opten por acollerse á liquidación prevista no parágrafo anterior quedarán obrigados a efectuar o pagamento dunha cantidade equivalente á metade das cantidades pendentes de pagamento en virtude dos convenios de xestión asinados no seu momento co Consorcio. Co pagamento da citada cantidade, nos termos e condicións que se acorden, daranse por cumpridas as obrigas pendentes.

Aos efectos da liquidación aludida, entenderase por “gastos de mantemento”, “gasto de funcionamento”, “gastos de xestión integral”, ou concepto equivalente empregado no convenio para determinar os gastos suxeitos a cofinanciamento das partes, os gastos inco-ridos nos conceptos de gasto corrente (capítulos I a IV) de cada unidade.

Tres.- No caso de que os municipios se encontrasen ao corrente nos pagamentos ao Consorcio, no convenio coa axencia para a xestión dos centros recollerase unha dedución na contribución financeira á axencia en contía equivalente á cantidade obtida de aplicar o criterio establecido no apartado 2 da presente disposición, e durante o prazo que as partes negocien atendendo ás cantidades aboadas. O mesmo procedemento se seguirá cos municipios que tivesen satisfeito parcialmente as súas débedas co Consorcio, respecto á cantidade da débeda parcialmente aboada.

CAPÍTULO XI *Medidas de racionalización*

Artigo 84.- *Silencio administrativo.*

Engádese un terceiro parágrafo ao artigo 6 da Lei 14/2013, do 26 de decembro, de racionalización do sector público autonómico, co seguinte contido:

“O informe tecnolóxico e funcional regulado no presente artigo, cando se refira a bases reguladoras ou convocatorias de subvenciones financiadas con fondos europeos, entenderase emitido con carácter favorable, transcorrido o prazo máximo de cinco días dende que a solicitude teña entrada, conforme aos requisitos esixidos pola lexislación específica aplicable, ante os órganos competentes para emitilo. En caso contrario, requirirase ao órgano solicitante para que subsane as faltas ou acompañe os documentos preceptivos nun prazo máximo de cinco días, con indicación de que, si así non o fixese, o informe se entenderá emitido en sentido desfavorable.”

Artigo 85.- *Racionalización dos contratos de transporte escolar.*

Un.- Para os efectos do disposto na lexislación de contratos aplicable aos contratos de transporte escolar da Xunta de Galicia, considerarase que concorren motivos de interese público para a súa resolución e/ou modificación nos supostos de actuacións de racionalización e estruturación derivadas de cambios nas condicións dos trazados e infraestruturas viarias, no número e características dos pasaxeiros e na rede de centros de ensino así como de necesidades de optimización dos servizos, sempre que estas últimas teñan como finalidade o logro dos obxectivos de estabilidade orzamentaria e sustentabilidade financeira.

Dous.- A tramitación das actuacións de racionalización e de estruturación indicadas no apartado anterior, cando afecten a varios contratos relacionados entre si, acumularanse nun único procedemento.

Tres.- Nos procedementos de modificación, resolución e estruturación dos contratos de transporte escolar da Xunta de Galicia tramitados ao longo de cada curso escolar aplícaranse as seguintes regras:

- a) Dado o carácter esencial e impostergable da prestación do servizo de transporte escolar, una vez constatada a concorrencia dos presupostos que habilitan as resolucións, modificacións e estruturacións contractuais así como a existencia do crédito orzamentario necesario para acometelas, os órganos competentes en materia de transporte escolar poderán acordar a execución provisional inmediata dos servizos de transporte na forma que se recolla na proposta técnica de ruta que elaboren os servizos provinciais.

- b) Nos supostos de resolución, os acordos de execución provisional levarán consigo o efecto legal de suspensión total ou parcial da execución dos contratos afectados na medida determinada pola indicada proposta técnica. A suspensión implicará, no seu caso, a indemnización dos danos producidos polas actuacións preparatorias de posta a disposición polas empresas de medios materiais e persoais asociados á execución dos contratos suspensos.
- c) As modificacións e estruturacións contractuais nas que concorran motivos de interese público terán as seguintes especialidades:
- Estarán excepciónadas do informe previo da asesoría xurídica cando a súa contía non supere o 20 % do prezo do contrato/día que se vai modificar e o importe anual que represente a modificación non supere os 18.000 euros, imposto sobre o valor engadido excluído.
 - Non estarán sometidas á intervención previa prevista no artigo 97.1 do Texto refundido da Lei de réxime financeiro e orzamentario de Galicia, aprobado polo Decreto legislativo 1/1999, do 7 de outubro.
- Malia o anterior, a Intervención delegada da Consellería de Cultura, Educación e Ordenación Universitaria comprobará, antes da fiscalización do primeiro pagamento, o cumprimento de todos os requisitos esixidos para autorizar e comprometer o gasto.
- d) Os procedementos de racionalización e de estruturación acumulados poderán rematar coa modificación dos contratos por combinación ou unificación de itinerarios e, no seu caso, coa extinción dos contratos relacionados que atendían estes.
- e) A Administración resolverá os contratos de transporte escolar, de conformidade cos requirimentos legais na materia, salvo que, no momento de emisión da resolución administrativa que poña fin ao procedemento transcorrese xa o prazo de vixencia do contrato, caso no que constatará a supresión do servizo e, polo tanto, a imposibilidade da súa prórroga.

CAPÍTULO XII.- *Disciplina orzamentaria e sustentabilidade financeira*

Artigo 86.- *Principio de estabilidade orzamentaria*

Modifícase a alínea 2 do artigo 4 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“2. Entenderase por estabilidade orzamentaria, en relación coas entidades do artigo 2.2 a), a situación de equilibrio ou superávit estrutural en termos de capacidade de financiamento acorde coa definición contida no sistema europeo de contas nacionais e rexionais.”

Artigo 87.- *Instrumentación do principio de estabilidade orzamentaria*

Modifícase o artigo 9 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“Artigo 9. Instrumentación do principio de estabilidade orzamentaria

1. A elaboración, aprobación e execución dos presupostos e demais actuacións que afecten aos gastos ou ingresos dos axentes comprendidos no artigo 2.2 a) someterase ao principio de estabilidade orzamentaria.

Non obstante, poderán presentar déficit estrutural, definido como déficit axustado do ciclo, neto de medidas excepcionais e temporais, exclusivamente nos seguintes casos:

- a) en caso de reformas estruturais con efectos orzamentarios a longo prazo. Neste caso, o déficit estrutural será que acorde a comunidade autónoma de acordo co Consello de Política Fiscal e Financeira.
 - b) e, excepcionalmente, en caso de catástrofes naturais, recesión económica grave ou situacións de emerxencia extraordinaria que escapen ao control da administración autonómica e prexudiquen considerablemente a súa situación financeira ou a súa sustentabilidade económica ou social, nos termos que refire a normativa de estabilidade orzamentaria.
2. Para o cálculo do déficit estrutural aplicarase a metodoloxía utilizada pola Comisión Europea no marco da normativa de estabilidade orzamentaria.
 3. A elaboración, aprobación e execución orzamentaria dos axentes aos que se refire o artigo 2.2 b) realizarase en posición de equilibrio financeiro, de acordo cos criterios do plan de contabilidade que lles sexa aplicable.

Entenderase que un axente se atopa en situación de desequilibrio financeiro cando incorra en perdas cuxo saneamento requira a dotación de recursos non previstos nos orzamentos dos axentes do artigo 2.2 a) que os acheguen.

Artigo 88.- *Eliminación do déficit adicional por investimentos produtivos.*

Suprímese o artigo 10 da Lei 2/2011, do 16 de xuño, de disciplina orzamentaria e sustentabilidade financeira.

Artigo 89.- *Límite do gasto non financeiro.*

Modifícase o artigo 12 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“ Artigo 12 Límite do gasto non financeiro.

1. Aprobado o obxectivo de estabilidade do artigo 4.1, o Consello da Xunta acordará o límite máximo de gasto non financeiro dos orzamentos xerais da comunidade autónoma. Este acordo remitiráselle ao Parlamento de Galicia para a súa aprobación xunto con o informe de estratexia financeiro-fiscal ao que se refire o artigo 11.2 desta lei.
2. O límite de gasto será coherente co obxectivo de estabilidade orzamentaria e coa regra de gasto establecida nas normas de estabilidade orzamentaria. O límite aprobado poderá ser axustado na variación dos ingresos do sistema de financiamento e fondos finalistas que incorpore o proxecto de lei de orzamentos da Administración xeral do Estado. Este axuste presentarse ao Parlamento conxuntamente co proxecto de lei de orzamentos.
3. A variación do gasto computable do sector público autonómico, non poderá superar a taxa de referencia de crecemento do Produto Interior Bruto de medio prazo que informe cada ano o Consejo de Política Fiscal y Financiera.
Non obstante, cando exista un desequilibrio estrutural nas contas públicas ou unha débeda pública superior ao obxectivo establecido, o crecemento do gasto público computable axustarase á senda establecida nos respectivos plans económico-financeiros e de reequilibrio previstos esta lei.
4. Cando se aproben cambios normativos que supoñan variacións permanentes da recadación, o nivel de gasto computable resultante da aplicación da regra nos anos en que se produzan esas variacións de recadación deberá axustarse na contía equivalente.”

Artigo 90.- *Cumprimento do obxectivo de estabilidade orzamentaria.*

Modifícase o artigo 13 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“Artigo 13. Cumprimento do obxectivo de estabilidade orzamentaria.

1. Correspóndelle ao Consello da Xunta de Galicia, sen prexuízo das competencias do Consello de Política Fiscal e Financiera, velar pola aplicación dos principios de estabilidade orzamentaria y de sustentabilidade financeira en todo o ámbito subxectivo desta lei.
2. Os axentes incluídos no artigo 2 remitiranlle información periódica á Intervención Xeral da comunidade autónoma, de xeito que se posibilite un seguimento efectivo do cumprimento do obxectivo de estabilidade orzamentaria, do obxectivo de débeda pública o da regra de gasto.

3. No caso de que incumpra a obriga de remisión de información periódica ou de que se aprecie un risco de incumprimento do obxectivo de estabilidade orzamentaria, do obxectivo da débeda pública ou da regra do gasto, a consellería competente en materia de facenda poderá formularlle unha advertencia ao axente responsable e daralle conta dela, para o seu coñecemento, ao Consello da Xunta.
4. O Consello da Xunta, por proposta da consellaría competente en materia de facenda, adoptará as medidas de axuste precisas para garantir o cumprimento do obxectivo de estabilidade orzamentaria, do obxectivo da débeda pública ou da regra do gasto, no caso de en que a evolución dos ingresos ou gastos difira da prevista e poida impedir o seu cumprimento.
5. No caso de que o sector público autonómico incumpra o obxectivo de estabilidade orzamentaria, o obxectivo de débeda pública ou a regra de gasto formularase un plan económico-financieiro que permita no ano en curso e no seguinte o cumprimento dos obxectivos ou da regra de gasto, co contido e alcance previstos na normativa de estabilidade orzamentaria.
6. No caso de que o sector público autonómico incorra en déficit estrutural ou superen o límite de débeda como consecuencia de catástrofes naturais, recesión económica grave ou situacións de emerxencia extraordinaria que escapen ao control das Administracións Públicas e prexudiquen considerablemente a súa situación financeira ou a súa sustentabilidade económica ou social se formulará un plan de reequilibrio que permita a corrección das devanditas desviacións tendo en conta a circunstancia excepcional que orixinou o incumprimento co contido e alcance previstos na normativa de estabilidade orzamentaria.
7. Os plans económico financieiro e os plans de reequilibrio aprobaranse polo Consello da Xunta, por proposta da consellería competente en materia de facenda, e remítanse ao Consello de Política Fiscal e Financeira de acordo co previsto na normativa de estabilidade orzamentaria.”

Artigo 91.- Actuacións na liquidación dos orzamentos.

Modifícase o artigo 16 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“Artigo 16. Actuacións na liquidación dos orzamentos.

1. No suposto de que a liquidación orzamentaria dalgún dos axentes do artigo 2.2 a) incumpra o obxectivo de estabilidade, o obxectivo de débeda pública ou a regra de gasto, remitirán ao Consello da Xunta un plan económico-financieiro de reequilibrio no prazo de 10 días dende que se constate o dito incumprimento.
2. O plan conterá a seguinte información:
 - As causas do incumprimento.

- As previsións de ingresos e gastos, baixo o suposto de que se manteñen inalteradas as políticas en vigor.
 - A descrición, cuantificación e o calendario de aplicación das medidas incluídas no plan, sinalando as partidas presupostarias ou rexistros extrapresupostarios nos que se contabilizarán.
 - Mediante orde da consellería competente en materia de facenda poderá incrementarse a información contida no plan.
3. No suposto de que a liquidación orzamentaria dalgún dos axentes aos que se refire o artigo 2.2 b) se atopase en situación de desequilibrio financeiro, estará obrigado a elaborar un informe de xestión sobre as causas do desequilibrio e, se é o caso, un plan de saneamento a medio prazo, cando incorran en perdas que afecten o cumprimento do obxectivo de estabilidade orzamentaria. Neste informe recolleranse as medidas correctoras de carácter económico-financieiro que haberán de ser adoptadas polos seus órganos reitores para a eliminación de perdas ou para achegas de beneficios.
4. O contido, o prazo e o procedemento para a presentación do informe de xestión e do plan de saneamento desenvolveranse por orde da consellaría competente en materia de facenda.

Artigo 92.- *Instrumentación do principio de sustentabilidade financeira*

Modifícase o artigo 17 da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“Artigo 17. Instrumentación do principio de sustentabilidade financeira

1. O volume de débeda pública, definida de acordo co Protocolo sobre Procedemento de déficit excesivo, dos axentes incluídos no ámbito de aplicación da lei, non poderá superar o límite establecido nas normas de estabilidade orzamentaria.
2. Os axentes incluídos no ámbito de aplicación desta lei haberán de estar autorizados por lei para emitir débeda pública ou contraer crédito.”

Artigo 93.- *Réxime transitorio.*

Engádesse unha disposición transitoria segunda a Lei 2/2011, do 16 de xuño, de disciplina orzamentaria e sustentabilidade financeira, co seguinte contido:

“En 2020 deben cumprirse os límites de equilibrio ou superávit estrutural e de débeda pública, ata o devandito ano será de aplicación o réxime transitorio establecido nas normas de estabilidade orzamentaria.”

Artigo 94.-*Remisión normativa*

Modifícase a disposición derradeira primeira da Lei 2/2011, do 16 de xuño, de disciplina orzamentaria e sustentabilidade financeira, que queda redactado como segue:

“Disposición derradeira primeira. Remisión normativa.

As referencias efectuadas nesta lei á normativa de estabilidade orzamentaria entenderanse feitas ao artigo 135 da Constitución Española, a lei orgánica que desenvolve o devandito artigo, ás disposicións ditadas no seu desenvolvemento e aos acordos adoptados no seo do Consejo de Política Fiscal y Financiera.